

20 AUG 1996

UMNO TENTUKAN KEDUDUKAN EXCO KELANTAN DARI S46

KOTA BAHARU, 20 Ogos (Bernama) -- Kedudukan keempat-empat anggota Exco Kerajaan Negeri Kelantan daripada Parti Melayu Semangat 46 (S46) akan ditentukan oleh kepimpinan Umno setelah mereka menyertai Umno, kemungkinan pada 6 Okt ini.

Pengerusi Perhubungan S46 Kelantan Datuk Rozali Isohak berkata kedudukan dan masa depan beliau bersama dengan tiga anggota Exco S46 lain sewajarnya ditentukan oleh Umno dan mereka akan akur dengan keputusan pemimpin Umno setelah S46 secara rasmi dibubarkan dan semua ahlinya diterima menyertai Umno.

"Sekiranya Umno memutuskan kita berundur maka kita akan berbuat demikian," katanya di sini hari ini.

Rozali yang juga Timbalan Menteri Besar II Kelantan berkata beliau yakin apabila S46 menyertai Umno kedudukan anggota Exco itu akan diputuskan secara muafakat bagi kepentingan bersama.

Pas yang menerajui kerajaan Kelantan masih menghadapi kebuntuan sejak sebulan lepas untuk memecat anggota Exco S46- itu daripada Exco Negeri setelah gagal menghadap Sultan Kelantan bagi mendapatkan perkenan berbuat demikian seperti yang dikehendaki oleh Perlembagaan Negeri.

Rozali juga berkata Perdana Menteri Datuk Seri Dr Mahathir Mohamad dijangka akan menghadiri majlis ceramah umum di sini anjuran S46 dan Umno Kelantan pada 3 Okt ini bagi memaklumkan kepada rakyat Kelantan mengenai usaha menyatukan kedua-dua parti itu. -- BERNAMA

RAR MAI